

In filosof conquista il mund

DA JOHANN ULRICH SCHLEGEL

■ Avant 125 onns, ils 14 da mars 1883, è mort Karl Marx, il qual n'ha betg mo interpretà il mund, mabain era midà quel sco strusch in auter filosof en l'istorgia da l'umanità. La citad da Trier a la riva da la Mosel è stada duas giadas en l'istorgia il lieu natal d'in sontg. Nus chattain oz a Trier ina scola elementara d'Ambrosi ed ina plaiv da S. Ambrosi. Dal segund sontg dat la chasa da Karl Marx perditga. E quest segund sontg è senza dubi daventà il pli prominent.

Karl Marx è il fundatur d'ina ideologia che ha svidà il tshiel cristian da ses antecessurs antics per realisar il spendrament da l'uman uss e sin quest mund. En la fluriziun dal marxissem en il 20avel tschien-taner vegniva prest la mesadad dal mund governada da stadis che suandavan la duc-trina da Marx.

Ma co è quai stà pussaivel ch'in singul uman, e quai in filosof, ha gudagnà en il temp modern ina tala pussanza sin il svilup da l'istorgia umana?

L'attracziun quasi religiusa

La filosofia marxistica è il davos grond sistem ideologic che l'istorgia moderna ha stgaffi enfin oz. La gronda influenza dal marxissem e sia attracziun èn d'attribuir surtut a sias empermischuns e profezias. Questas profezias han cuntanschì ina tala dinamica ed ina cardientscha uschè ferma che la teoria da Karl Marx ha survegnì tratgs quasi religius. En questa religiun avev'ins bain allontanà Dieu, ma la fervenza e la cardientscha incontestabla, e damai sanctifigada, aveva survegnì il medem pais sco dals temps ils pli fritgaivels da la Baselia catolica.


En il mainstream da l'atgna epoca

Karl Marx è naschì ils 5 da matg 1818 sco figl dal cusseglier da justia Heinrich Marx. Il bab vegniva d'ina famiglia da rabbins, era dentant obligà al spiert da l'epoca da l'illuminissem ed è sa convertì cun sia famiglia al protestantissem. Durant il temp da studi simpatisava Karl Marx fermamain cun la filosofia da Friedrich Hegel ch'era da quel temp en moda. A Colonia è el daventà chauradatur da la «Rheinische Zeitung» ch'era fitg liberal-sanestra. Plinavol ha Marx fatg da la gasetta l'organ principal da l'opposiziun. Sia activitad schurnalistica ha prendì ina fin andetga, cura che las autoritads prussianas han intervegnì massivamain ed han scumandà la gasetta.

Marx è emigrà en Frantscha ed è sa collià als socialistas. A Paris ha el inscuntrà Friedrich Engels. Il bab da quel possede-va fabricas en Germania ed a Manchester, Engels sez manava la fabrica a Manchester ed el ha introduci Marx en la lavur industrial. Avant la Revoluziun dal 1848, cura che grondas parts da l'Europa èn vegnidas dominadas d'in radicalissem sanester pussant, han Marx ed Engels publictà il «Manifest da la partida comunista». Marx era involvì tant en las activitads revoluziunaras en Frantscha sco en Germania. Il 1848 è el fugi a Londra, nua ch'el ha vivì cun sia famiglia en gronda povradad enfin a sia mort ils 14 da mars 1883 ed è sa deditgà cun ina passiun revoluziunara instancabla a ses studis ed a sias publicaziuns. Ma el n'è betg stà sulet-tamain in teoreticher da la societad da lavur. El era medemamain in agitatur vehement da la politica e publicitava savens fecls sgulants provocants. Il pli enconuschenta è dentant daventada sia ovra principala monumental «Il chapital». Il segund e terz tom da quest'ovra èn cumparids pir suenter sia mort.

Radicalissem, dialectica, materialissem

Il patratgar da Karl Marx è vegnì alimentà da trais influenzas. Marx sa basa sin il cumpendi dals radicals filosofics contemporans e sviluppa in nov punct da vista or da l'optica dal lavurer. L'uman che lavura crescha valurs che surpassan dentant lunsch ses salari. La plivalur va a favur dal chapitalist



Karl Marx (1818–1883), scolar da Hegel, socioteoreticher e revoluziunari.



FOTOS MAD

che vegn adina pli ritg, cuntrari al lavurer che vegn adina pli pover.

La segunda funtauna da la duc-trina da Karl Marx è Georg Wilhelm Friedrich Hegel. Sco tar Hegel na gioga er en il marxissem betg l'individui la rolla decisiva, mabain l'entir sistem. Ed il sistem uman sa mussa en la societad industrial moderna sco sistem economic. Quel ston ins damai examinar pli en detagl. Tenor l'idea da Marx è quel sa furmà a moda evoluziunara en trais parts. Marx surpiglia la dialectica da Hegel senza midaments metodic. In process istoric maina als suandants trais pass da svilup: Las modas da produziun sviluppan cun il temp tensiuns internas – per exempel la discrepanza tranter las pajas. Questas tensiuns provotgeschan differenzas da classa e vegnan alura dissolidadas en ina sintesa pli auta, en la societad senza classas. L'intent dal marxissem è damai da promover ed accelerar quest svilup. La metoda è il cumbat da las classas.

Cuntrari a Hegel era Marx da l'idea ch'ins stoppia observar il mund sin basa d'ina duc-trina materialistica. Sia observaziun da l'istorgia n'è dentant betg mo l'observaziun d'in mecanissem. Anzi, ella è ina duc-trina che propagescha l'acziun. Da quel punct da vista ston ins era chapir il citat famus or da sias «Indesch tesas davart Feuerbach»: «Ils filosofas han unicamain interpretà il mund en differentas modas; l'important è dentant da midar il mund.»

Dal terror spiertal al terror fisic

Ils resultats da la teoria da Marx èn multifars. Ses aderents han adina puspè pru-va da far valair lur ideas en l'entir mund. Igl ha dà conflicts cun las ciencias natirals, perquai ch'ils process natirals ed ils andaments tecnicos na sa laschavan betg decelerar cun la metoda dal marxissem ch'era mintgatant fitg artificiala. Sin fundament da quest fatg vegnivan scienzias neutrals diffamads sco «bourgeois». Las consequenzas socialas eran anc pli vesavilas. Sch'insatgi n'observava betg la duc-trina marxistica, na valeva el betg sco progressiv e vegniva sbittà sco reacziunar. Il process dialectic en il mund, cun il qual gudogna apparentamain en mintga cas il progress, ha sco consequenza che contemporans nunconformists ston vegnir persecutads e sche necessari eliminads. Igl è evident co ch'ina tala diagnosa intoleranta ed unilateral dal mund po dar libra via ad in totalitarissem privlus ed ad ina duc-trina da l'apparat che sa senta sco sulet en possess da la dretga opiniun.

Il temp da fluriziun dal marxissem è bain passà oz cun il declin dal sistem sovietic. En il mainstream da l'intelligenza actuala dal vest, u da quai che sa considerescha sco intelligenza, n'èn dentant anc betg svanidas las ideas ed ils slogans dal vocabulari d'antieri comunists barbars e da vegls marxists. Anzi, in marxissem latent è s'uni, sin il nivel ordvart seductiv dal materialissem, a moda sorprendentamain solidarica cun la burgaisia da pli baud, vul dir il chapitalissem.



Il monument da fossa per Karl Marx sin il santeri da Highgate (Londra).



«Il chapital» (scrit en il Museum britannic), frontispizi.



Il «Manifest» da Marx ed Engels, cumpari la saira avant la Revoluziun dal 1848.